

Qanoq iliornikkut tusagassiortunngorusunneq annertusarsinnaanersoq pillugu apeqquteqaat aallaavigalugu Inatsisartunut oqallisissiasatut siunnersuut.

(Inatsisartunut ilaasortaq, Aqqalu C. Jeremiassen, Atassut)

Akissuteqaat

(Meeqqanut, Inuusuttunut, Ilinniartitaanermit, Kultureqarnermit, Timersornermit Ilageeqarnermullu Naalakkersuisoq)

Naalakkersuisut isornartorsiortumik tusagassiorneq illersorneqartariaqartoq isumaqatigaat. Tamat oqartussaaqataanerat ingerlalluassappat tunngavilersorluakkamik isornartorsiornermillu tusagassiorneq pisariaqarpoq. Tusagassiortut uagullu politikerit akornanni oqaloqatigiittoqarneratigut tamanut ingerlatitseqqiisoqartassaaq, tamat oqartussaaqataaneranut nukittorsaasumik. Taamaammat isornartorsiortumik tusagassiorneq illersortariaqparput.

Naalakkersuisut ilisimaaraat tusagassiorfinni tusagassiortunik ingammillu kalaallisut oqaasilinnik nunatsinni amigaateqartugut. Ingammillu nunatsinni tusagassiiviit annersaat KNR tusagassiortussaaleqinermit ilungersunartumik sivitsortumillu eqqugaaqqavoq.

Tusagassiornermit Ilinniarfiup nunatsinni tusagassiorfinni tusagassiortut amigaatigineqartut ilisimalluarpaattaaq. Ukiuni arlalinni ilinniartussanik pilerisaarisarnerit ingerlanneqartarput, annertunerusumik iluatsiffiunngitsumik. Naalakkersuisut ilisimaaraat massakkut ilinniartitaaneq nalilersorneqarluni aallartittoq.

Nunatsinni tusagassiornermit tusagassiuutinilu pisariaqartinneqartunut naleqqiullugit ikippallaat ilinniakkamik naammassisarput.

Tusagassiortutut tusagassiivinni sulinissaq pilerinartuunissaa pingaaruteqarpoq taavalu aamma sulinermit sinaakkutissat pitsaasusariaqarlutik. Tusagassiornermit peqatigiiffik ataatsimeeqatigineranni tamanna ilaatigut oqariartuutigineqarpoq. KNR-illu aamma oqariartuutiguartarpaa illorsuarmik pisariaqartitsillutik, sulisuminnut atugassarititaasut pitsaanerulerniassammata. Kisimiillunga tamanna aalajangiiffigisinnaanngilara. Tassanilu inatsisartuni ilaasortat ataqqinartusi peqataanissarsi avaqqunneqarsinnaanngilaq.

Taamatut oqaaseqarlunga oqallilluarnissassinnik tamassi kissaappassi.